

PACIS QVERIMONIA




DES ERAS ROTE

Sicida pax haud constat affinitatibus Cijj
quoniam impia felicitas a publica pendet
infelicitate E iij




Inc. 2784 -

H. IV. 5 a-d



Ther
5381





QVERELA

PACIS VNDIQVE GEN-
TIVM BIECTAE PRO-
FLIGATAEQVE.

AVTORE ERASMO
ROTTERODAMO.





CLARISSIMO PRAESVLI TRAIE-
CTENSI PHILIPPO, ERASMVVS
ROTERODAMVS. S. D.



RATV LARER tibi Philippe praesul
non minus uitae ornamētis, q̄ summo
rum ducum imaginibus clarissime q̄d
tanti muneris honore sis auctus, ni cō-
pertum haberem, quam inuitus susce-
peris, quāq; grate optimi, maximiq; principis CA-
ROLI auctoritate fueris adactus, cuius alioqui chari-
tati nihil non eras daturus, Atq; hāc ipsa res spem no-
bis certissimam facit fore, ut cum laude perfungaris su-
scepto, quādoquidem Plato uir exquisitissimi, planeq;
diuini iudicij, non alios existimat ad rempublicam ge-
rendam idoneos, quam eos, qui huc nolentes pertra-
huntur. Auget autem nostram de te fiduciam, quoties
in mentem uenit, & cui tu succedas fratri, & quo patre
sitis ambo profecti, Nam Dauid uir eruditus iuxta ac
prudens, permultis annis sic locum istum tenuit, ut su-
is ornamentis, plurimum splendoris ac dignitatis addi-
derit ipsi numeri, per se licet amplissimo. Multis modis
magnus ac suspiciendus, sed in hoc praecipue salutaris
reipublicae, quod nihil ducebat antiquius sibi, pace pu-
blica, hac quoq; in parte patrem PHILIPPVM Bur-
gundiae ducem referēs, uirum nulla non re maximum
sed tamen pacis artibus, cum primis insignem & æ-
ternae hominum memoriae commendatum, Qui tibi
hoc etiam impensius erit exprimendus, non tantum
ut filius patri, sed ut PHILIPPVS Philippo respon-

EPISTOLA NVNCVPATORIA

deas. Intelligit iam dudū tua prudentia, quid abs te populus uniuersus expectet. Triplex onus humeris sustines, patris exemplum ac fratris, tum horum temporū fata, (quid enim aliud dicam?) nescio quomodo ad bellum pertrahentia. Vidimus ipsi nuper, ut quidā amicis quam hostibus grauiores, nihil intentatum reliquerint, ne bellorum aliquando finis esset, rursus ut uix expresserint alij qui reipu. principiq; ex animo bene uolunt, ut pacem cū Francis semper optandam, hisce uero temporibus etiam necessariam amplectaremur. Cuius sane rei indignitas mouit animum meum, ut tum pacis undiq; profligatae querimoniam scriberem, quo nimirū hac ratione, iustissimum animi mei dolorem, uel ulciscerer, uel lenirem. Libellum ad te, ceu primitiolas nouo episcopo debitas, mitto, quo diligentius tueatur tua celsitudo pacem utcūq; partam, si non patiar eam obliuisci quanto negotio nobis constiterit. Bene Vale.

QVERELA PACIS VNDIQUE
GENTIVM EIECTAE, PRO-
FLIGATAE QVE.
AVTORE DES. ERASMO RO-
TERODAMO.



I ME LICET immerentē suo tamen cō-
modo sic auersarentur, eijcerent, profliga-
rentq; mortales, meam modo iniuriam &
illorum iniquitatem deplorarem, nunc cū
me profligatam protinus fontem omnis humanæ foelis-
citatē ipsi a semet arceant, omniumq; calamitatum pes-
lagus sibi accersant, magis illorum mihi deplenda est in-
foelicitas, quam mea iniuria, & quibus irasci tantū ma-
luisse, horū dolere vicem, hos cōmiserari compellor.
Nam utcunq; amantem ab se propellere, inhumanum
est, bene merentem auersari ingratum, parentem ac ser-
uatricem omniū affligere, impiū. Cæterum tot egre-
gias cōmoditates, quas mecum adfero, sibi metipsis in-
uidere, proq; his ultro tam tetram malorum omnium
lernam accersere. An non hoc extremæ cuiusdam de-
mētiae uidetur? Sceleratis irasci par est, at sic furis actos
quid aliud quam deplere possumus? Qui non alio sane
nomine magis deplendi sunt, quam quod ipsi sese non
deplent, nec alio magis infœlices, quam quod infœlici-
tatem suam non sentiunt. Quando nonnullus gradus
est ad sanitatem, morbi sui magnitudinem agnoscere.
Etenim si ego Pax illa diuorum simul & hominum vo-
ce laudata, fons, parens, alrix, ampliatrix, tutatrix, rerū
bonarum omnium, quas uel cœlum habet, uel terra, Si

PACIS QVERIMONIA

sine me nihil usquam florens, nihil tutum, nihil purum
 aut sanctum, nihil aut iucundum hominibus aut gratū
 superis, Si contra hæc omnia, bellum semel omnium ma-
 lorum quicquid usquam est in rerum natura oceanus
 quidam, si huius uitio subito marcescunt florentia, dila-
 buntur aucta, labascunt fulta, pereunt bene cōdita, ama-
 rescunt dulcia, deniq; si res est adeo non sancta, ut omnis
 pietatis ac religionis sit maxime præsentanea pestis, Si
 nihil hoc uno infortunius hominibus, nihil inuisius supe-
 ris, Quæso per deum immortalem, quis credat istos ho-
 mines esse, quis credat ullam sanæ mentis micam inesse
 qui me talem, tantis impendens, tantis studiis, tanto mo-
 limine, tot technis, tot curis, tot periculis, student eijce-
 re, tātumq; malorum uelint tam chare emere? Si me ad
 istum modum spernerent feræ, leuius ferrem, & in me
 admissam contumeliam, naturæ imputarem, quæ inge-
 nium immite inseuisset, si mutis pecudibus essem inuis-
 sa, condonarem inscitiam, propterea quod his ea uis ani-
 mi negata sit, quæ sola dotes meas queat perspicere, At
 o rem indignam ac plusquam prodigiosam, unum ani-
 mal ædedit natura, ratione præditum, ac diuinæ mentis
 capax, unum beniuolentiæ concordiaq; genuit, & ta-
 men apud quantumlibet efferas feras, apud quantum-
 uis brutas pecudes, mihi citius locus sit quam apud ho-
 mines, iam tot orbium cœlestium, licet nec motus sit idem,
 nec uis eadem, tamē ipsi tot iam seculis cōstant, uigentq;
 fœdera, Elementorum pugnantes inter se uires, æqua-
 bili libramine pacem æternam tuentur, & in tanta dis-
 cordia, consensu, cōmertioq; mutuo concordia alunt.
 In animantium corporibus quam fidus membrorum in-
 ter ipsa consensus, quam parata defensio mutua, Quid

DES. ERAS. ROTEROD. AVTORE.

tam dissimile quam corpus & anima: Et tamen quam
 arcta necessitudine cōnexuerit hæc duo natura, nimirū
 declarat ipsa diuulsio, proinde ut uita nihil aliud est, q̃
 corporis & animæ societas, ita sanitas omniū corporis
 qualitātū concentus est. Animātia rationis expertia in
 suo quæq; genere ciuiliter cōcorditerq; degūt. Armen
 ratim uiuunt elephanti, gregatim pascunt fues & oues
 turmatim uolant grues & graculi habent sua comitia
 Ciconiæ, pietatis etiam magistræ, mutuis officijs sese tu
 entur Delphini. Nota est formicarū & apum inter ipsas
 concors politia. Sed quid de his loqui pergo, quæ tam
 & si ratione uacant, sensu non uacant? In arboribus, in
 herbis amicitiam possis agnoscere. Steriles sunt quæ
 dam, nisi marem adiungas, uitis ulmum amplectitur, ui
 tem amat persica, Vsq; adeo quæ nihil sentiunt, tamen
 pacis beneficiū sentire uident, Sed hæc rursus ut senti
 endi uim non habēt, ita quod uitā habeant, ijs, quæ sen
 tiunt finitima sunt. Quid æque brutum atq; saxorū ge
 nus? Dicas tamen his quoq; pacis & cōcordiæ sensum
 esse. Ita magnes ferrum ad sese trahit, attractum tenet.
 Quid quod inter immanissimas etiam feras conuenit?
 Leonum inter ipsos feritas nō dimicat, Aper in aprum
 non uibrat dentem fulmineū, Lynxi cum lynce pax est,
 Draco nō sœuit in draconē, luporum concordia etiam
 prouerbia nobilitarunt, Addam, quod magis etiam mi
 rum uideatur, impij spiritus, per quos cœlitum atq; ho
 minū concordia primū dirupta est, & hodie rumpitur,
 tamen inter se foedus habent, suamq; illam qualēcunq;
 tyrannidē cōsensu tuentur, solos homines, quos omniū
 maxime decebat unanimitas, quibusq; cū primis opus
 est ea, neq; natura tam alijs in rebus potēs & efficax cō

PACIS QVERIMONIA

ciliat, nec institutio coniungit, nec tot ex consensu profecturae commoditates conglutinant, nec tantorum denique malorum sensus & experientia, in mutuam amorem redigit. Figura communis omnium, uox eadem, & cum cetera animantium genera, corporum formis potissimum inter se differant, uni homini indita uis rationis, quae ita sit illis inter ipsos communis, ut cum nullo sit reliquorum animantium communis, uni huic animanti sermo datus, praecipuus necessitudinum conciliator. Insita sunt communiter disciplinarum ac uirtutum semina, ingenium mite, placidumque, & ad mutuam beneuolentiam propensum, ut per se iuuat amari, & iucundum sit de alijs bene mereri, nisi quis prauis cupiditatibus, ceu Circes pharmacis corruptus ex homine degenerarit in beluam. Hinc est uidelicet, quod uulgus quicquid ad mutuam beneuolentiam pertinet, humanum appellat. Addidit lachrymas, exorabilis ingenij documentum, quo si quid forte inciderit offensae, & amicitiae serenitatem nubecula alio qua offuscarit, facile redeant in gratiam. En quot rationibus natura concordiam docuit? Nec his tamen contenta pacis lenocinijs amicitiam homini non solum iucundam esse uoluit, uerum etiam necessariam. Eoque tum corporum, tum animorum dotes ita partita est, ut nemo sit omnium tam instructus, quin infimorum etiam officio nonnunquam adiuuetur, nec eadem attribuit omnibus, nec paria, ut haec inaequalitas mutuis amicitijs aequaretur. Alijs in regionibus alia proueniunt, quo uel usus ipse mutua doceret comertia. Ceteris animantibus suatribuit arma, praesidiaque, quibus sese tuerentur, unum hominem produxit inermem, atque imbecillum, nec prorsus aliter tutum, quam foedere, mutuaque necessitudine.

DES. ERAS. ROTEROD. AVTORE.

Ciuitates repperit necessitas, & ipsarum inter se societa-
tem docuit necessitas, quo ferarum ac prædonum uim
iunctis uiribus propellerēt. A deo nihil est in rebus hu-
manis, quod ipsum sibi sufficiat. In ipsis statim uitæ pris-
mordijs perisset hominum genus, nisi conditum pro-
pagasset coniugalis concordia, nec enim nasceretur ho-
mo, & mox natus interiret, atq; in ipso uitæ limine uitā
amitteret, nisi obstetricum amica manus, nisi nutricum
amica pietas succurreret infantulo. Atq; in hunc usum
uehementissimos illos pietatis igniculos inseuit, ut pa-
rentes etiam illud ament, quod nondum uiderunt. Ad-
iécit mutuam liberorum erga parentes pietatem, ut illo-
rum imbecillitas horum præsijs uicissim subleuaretur
fieretq; illa cunctis quidē ex æquo plausibilis, sed græ-
cis aptissime dicta ἀντιπαλάγγωσις. Accedūt huc cogna-
tionum & affinitatum uincula. Accedit in nonnullis in-
geniorum, studiorū, formæq; similitudo, certissima be-
niuiolentiæ conciliatrix, in multis arcanus quidam anis-
morum sensus, ac mirus ad mutuum amorem stimulus
quem ueteres admirati numini ascribebant, Tot argu-
menti natura docuit pacem, concordiamq; tot illece-
bris ad eam inuitat, tot laqueis trahit, tot rebus compel-
lit, Et post hæc quænam ista tam ad nocendum efficax
Erinnys, his omnibus disruptis, disiectis, discussis, in-
satiabilem pugnandi furiam inseuit humanis pectoris
bus? Nisi primum admirationem, deinde sensum etiam
mali adimeret assuetudo, quis crederet humana mente
præditos istos, qui sic iugibus dissidijs, litibus, bellis in-
ter sese certant, rixantur, tumultuantur? Postremo rapi-
nis, sanguine, cladibus, ruinis sacra, profanaq; miscent
omnia, nec ulla tam sancta foedera, quæ illos in mutuam

PACIS QVERIMONIA.

perniciem debacchantes queant dirimere. Vt nihil etiam accesserit, satis erat cōmune hominis uocabulum, ut inter homines conueniret. Sed esto nihil apud homines profecerit natura, quæ plurimum ualeat ut in beluis Ita ne & nihil apud Christianos ualuit Christus: parum efficax sit doctrina naturæ, quæ maximam uim habet in his quoque quæ sensu uacant, cæterum cum hac multo præstantior sit doctrina Christi, cur ea se profitentibus non persuadet id, quod unum omnium maxime suadet nempe pacem, mutuamque beneuolentiam? Aut saltem hanc tam impiam, efferamque belligerandi insaniam dedocet? Cum hominis uocabulum audio, mox accurro, uelut ad animal mihi propriè natum, confidens fore ut illic liceat acquiescere, cum Christianorum audio titulum, magis etiam aduolo, apud hos certe regnaturam etiam me sperans. Sed hic quoque pudet ac piget dicere, Fora, Basilicæ, curiæ, templa sic undique litibus perstrepunt, ut nusquam apud Ethnicos æque. Adeo ut cum bona pars humanæ calamitatis sit aduocatorum turba, tamen hæc etiam ad litigantium undas, paucitas sit, ac solitudo. Ciuitatem aspicio, spes ilico oboritur, inter hos saltem conuenire, quos eadem cingunt moenia eadem moderantur leges, & uelut una uectos naui cōmune continet periculum. Sed o me miseram, quæ hic quoque dissidijs omnia uitiata comperio, Adeo ut uix domum ullam reperire liceat, in qua mihi sit uel dies aliquot locus. Sed plebem omitto, quæ maris ritu, suis æstibus rapitur, in principum aulas, uelut in portum quendam me recipio. Erunt inquā certe apud hos locus paci, plus hi sapiunt quam uulgus, ut qui sint plebis animus, atque oculus populi, Tum eius uices gerunt, qui doctor est

DES. ERAS. ROTEROD. AVTORE.

& princeps concordiae, a quo quidem cum omnibus, tum his praecipue sum commendata. Et omnia bene pollicentur. Video blandas consalutationes, amicos complexus, hilares comotationes, caeteraque officia humanitatis. At o rem indignam, apud hos nec umbram verae concordiae licuit cernere. Fucata, fictaque omnia, factionibus apertis, clancularijs dissidijs ac simultatibus corrupta uniuersa. Denique adeo apud hos non esse sedem paci comperio, ut hinc potius omnium bellorum fontes ac seminaria. Quo me post hac conferam infelix, posteaque toties sefellit spes? At principes magni sunt potius quam eruditi, magisque ducunt cupiditatibus, quam recto animi iudicio. Ad eruditorum greges confugiam, Bonae literae reddunt homines, philosophia plusquam homines, theologia reddit diuos, Apud hos certe dabitur conuiuiscere, tot actae ambagibus. Verum prohdolor, en hic quoque bellorum aliud genus, minus quidem cruentum, sed tamen non minus insanum. Schola cum schola dissidet, et ceu rerum ueritas loco commutetur, ita quaedam scita non traiciunt mare, quaedam non superant alpes, quaedam non tranant rhenum, imo in eadem academia, cum rethore bellum est dialectico, cum iureconsulto dissidet theologus. Atque adeo in eodem professionis genere, cum Thomista pugnat Scotista, cum Reali Nominalis, cum Peripaterico Platonico, adeo ut ne in minutissimis quidem rebus inter hos conueniat, ac saepenumero de lana caprina atrocissime digladiantur, donec disputationis calor, ab argumentis ad conuiuia, a conuiuijs ad pugnos incrudescat, & si res pugionibus, aut lanceis non agitur, stilis ueneno tinctis sese confodiunt, dentata charta dilacerant inuicem, alter in alterius famam letalia lin-

PACIS QVERIMONIA

guarum uibrant spicula. Quo me uertam, toties expecta mihi data uerba? Quid superest, nisi una ueluti sacra ancora Religio. Huius professio licet sit Christianorū omnium cōmunis, tamen eam isti peculiariter profitentur titulo, cultu, ceremonijs, qui uulgo sacerdotum cognomento cōmendant. Hos itaq; procul intuenti cuncta spem faciunt, portum mihi paratum esse. Arrident uestes candidę, meoq; colore insignes, uideo cruces pacis symbola, audio dulcissimum illud fratris cognomen eximiae charitatis argumentum, audio salutationes pacis lato omine foelices, cerno rerum omnium cōmunis onem, coniunctum collegium, templū idem, leges eadem, conuentus quotidianus. Quis hic nō confidat paci locum fore? Sed o rem indignam, nusquam fere collegio conuenit cum episcopo, parum hoc, nisi & ipsi inter sese factionibus scinderentur. Quotusquisq; sacerdos est, cui nō sit cum aliquo sacerdote lis? Paulus rem non ferendam censet, quod Christianus litiget aduersus Christianum, & sacerdos cum sacerdote, episcopus cum episcopo certat. Verum his quoq; forsitan ignoscatur aliquis, quod longo iam usu, propemodum in prophanorum consortium abierunt, posteaquam eadem cum illis cōperūt possidere. Age fruantur hī sane suo iure, quod ceu præscriptione sibi uindicant. Vnum hominum genus superest, qui sic astricti sunt religioni, ut etiam si cupiant, nullo pacto queant excutere, non magis profecto, quam testudo domū. Sperarem apud hos mihi fore locum, nisi toties frustrata spes, me prorsus desperare docuisset. Et tamen ne quid intentatū relinqū, experiar. Quæris exitum? A nullis resiliū magis. Nam quid sperem, ubi religio cum religione dissidet? Tot fa

ctiones sunt; quot sunt sodalitia, Dominicales dissident
 cum Minoritis, Benedictini cum Bernardinis, Tot nomina,
 tot cultus, tot ceremoniæ studio diuersæ, ne quid
 omnino cõueniret, sua cuiq; placent, & aliena damnat,
 oditq; quisq;. Quin idem sodalitiū factionibus scinditur,
 Obseruantes insectantur Coletas, utriq; tertium ge-
 nus, quod a conuentu cognomen habet, cum nihil in-
 ter istos conueniat, iam ut par est omnibus rebus diffi-
 sa, optabam uel in uno quopiam monasteriolo latitare,
 quod uere tranquillum esset. Inuita dicam, quod utinã
 non esset uerissimum, nullum adhuc reperi, quod non
 intestinis odijs ac iurgijs esset infectum. Pudor sit recen-
 sere, quam nihili de nugis, tricisq; quantas cieant pug-
 gnas uiri senes, barba, pallioq; ferendi, postremo ut sibi
 uident impense tum eruditi, tum sancti. Arridebat spes
 nonnulla fore, ut alicubi inter tot coniugia qualiscunq;
 daretur locus. Quid enim non pollicetur, domus com-
 munis, fortuna cõmunis, lectus cõmunis, liberi cõmu-
 nes? Deniq; corporum ipsorum ius mutuums? ut unũ
 potius hominem credas, e duobus conflatum, q̃ duos?
 Huc quoq; sceleratissima illa Aeris irrepsit, totq; uincu-
 lis copulatos dirimit dissidijs animorum, & tamen inter
 hos citius contingat locus, quam inter eos, qui tot titu-
 lis, tot insignib⁹, tot ceremonijs, absolutã charitatẽ pro-
 firentur. Tandem illud in uotis esse cœpit, ut saltem in
 unius hominis pectore dareť locus. Ne id quidẽ conti-
 git, idem homo secũ pugnat, Ratio belligerat cũ affecti-
 bus, & insuper affectus cũ affectu cõflicatur, dum alio
 uocat pietas, alio trahit cupiditas. Rursum aliud suadet
 libido, aliud ira, aliud ambitio, aliud auaritia, Et huius-
 modi cũ sint, non pudet tñ illos appellari Christianos,

PACIS QVERIMONIA.

cum modis omnibus dissideant ab eo, quod Christo precipuū est, ac peculiare. Vniuersam eius uitā contemplare, quid aliud est, q̄ concordiaē mutuūq̄ amoris doctrina? Quid aliud inculcāt eius præcepta, quid parabola? nisi pacem, nisi charitatē mutuam? Egregius ille uates Esaías, cum cœlesti afflatus spiritu, Christum illum rerū omnium conciliatorem uenturū annūtiaret, num satrapam pollicetur? num urbium euerforem? num bellatorem? num triumphatorē? Nequaq̄. Quid igitur? Principem pacis, siquidem cum omnīū optimū principem intelligi uellet, ab ea re denotauit, quam omnium optimā iudicasset. Neq̄ mirū ita uisum Esaiaē, Cum Silius Ethnicus poeta hunc in modum de me scripserit, Pax optima rerum, quas homini natura dedit. Cōcinit huic mysticus ille Citharœdus, Et factus est inquiens, in pace locus eius. In pace dixit, non in tentorijs, non in castris, princeps est pacis, pacem amat, offenditur dissidio. Rursum Esaías, Opus iustitiæ pacē appellat, idē sentiens, nī fallor, quod sensit Paulus ille, & ipse e Saulo turbulentō redditus trāquillus, & pacis doctor. Cū charitatem cæteris omnibus arcani spiritus dotibus antepōnēs, quo pectore, qua facundia meum Encomium detonuāit Corinthijs. Cur enim non gloriē sic laudari a uiro tā laudato? Is alias deum pacis appellat, alias pacem dei uocat, palam indicās hęc duo sic inter sese cohærere, ut ibi pax esse non possit, ubi deus non adsit, nec illic esse deus possit, ubi pax non adsit. Itidem & pacis angelos in diuinis libris uocatos legimus, pios ac dei ministros, ut per se liqueat, quos belli angelos oporteat accipi. Audite strenui bellatores. Videte sub cuius signis militetis, nimirum illius, qui primus dissidium seuit inter

deum & hominem. Quicquid calamitatum sentit mortalitas, huic dissidio debet acceptum ferre. Friuolum est enim, quod arguantur quidam, in arcanis literis, deum exercituum, & deum ultionum dici. Permultum enim interest inter Iudeorum deum & Christianorum deum etiam si suapte natura unus & idem deus est. Aut si nobis quoque placent tituli ueteres, age sit exercituum deus, modo acies intelligas uirtutum concentum, quarum praesidio uitia demoliuntur homines prius, Sit ultio deus, modo uindictam accipias, uitiorum correctionem, ut cruentas strages, quibus Haebraeorum libri referti sunt, non ad laniandos homines, sed ad impios assectus e pectore profligandos referas. Sed ut quod institutum erat, persequamur, quoties absolutam felicitatem significant arcae literae, pacis nomine id faciunt, Velut Esaias, Sedebit, inquit, populus meus in pulchritudine pacis, Et alius, Pax inquit, super Israel. Rursum Esaias admiratur pedes annunciantium pacem, annunciantium bona. Quisquis Christum annuntiat, pacem annuntiat. Quisquis bellum praedicat, illud praedicat, qui Christi dissimillimus est. Age iam quare res dei filium pellexit in terras? Nisi ut mundum patri reconciliaret, ut homines inter se mutua & indissolubili charitate conglutina- ret, postremo, ut ipsum hominem sibi faceret amicum, Mea igitur gratia legatus erat, meum agebat negotium. Atque ob id Solomonem sui typum ferre uoluit, qui nobis, *εἰς ἡμᾶς*, id est pacificus dicitur. Quantumuis magnus erat Dauid, tamen quia bellator erat, quia sanguine fuerat impiatus, non sinitur extruere domum domini, Non meretur hac parte gerere typum Christi pacifici, iam illud interim perpende bellator, si prophanant

PACIS QVERIMONIA

bella, numinis iussu suscepta, gestaꝑ, quid facient quæ
 suasit ambitio, quæ ira, quæ furor? Si pium regem polo
 luit effusus sanguis Ethnicorum, quid faciet tam ino
 gens effusio sanguinis Christiani? Obsecro te Christiane
 ne princeps, si modo uere Christianus es, contemplare
 tui principis imaginē, obserua quomodo regnū suum
 inierit, quomodo progressus sit, quomodo hinc deces
 serit, & mox intelliges, quomō abs te geri uelit, nimirū
 ut summa curarum tuarum pax sit & concordia. Nato
 iam Christo, num bellicis tubis insonant angeli? Clan
 gorem tubarum audiere Iudæi, quibus bellare permis
 sum est. Hæc cōgruebant auspicia, quibus fas erat odif
 se inimicos, At genti pacificæ longe aliam cantionē ca
 nunt pacis angeli. Num classicum canunt? Num uictor
 rias, triumphos, trophæaq; pollicentur? Minime. Quid
 tandem? pacem annuntiant, congruentes cum prophe
 tarum oraculis, & annuntiant non ijs, qui cædes spirāt,
 ac bella, qui feroces ad arma gestiunt, sed qui bona uo
 luntate propensi sint ad concordiam, Prætexant quæ
 uelint suo morbo mortales, ni bellum amarent, non sic
 iugibus bellis inter se conflictarētur. Age Christus ipse
 iam adultus, quid aliud docuit, quid aliud expressit, q̃
 pacem? Pacis omine suos subinde salutat, Pax uobis,
 eamq; salutandi formam suis præscribit, ueluti unice di
 gnam Christianis. Atq; huius præcepti non immemo
 res apostoli, pacem præfantur in suis epistolis, pacem
 optant ijs, quos unice diligunt. Rem præclaram optat,
 qui salutem optat, sed foelicitatis summā precatur, quis
 quis pacem precatur, Hanc ille toties in omni uita cō
 mendatam, uide quanta solitudine cōmendet moritu
 rus, Diligatis, inquit, inuicem sicut dilexi uos, Ac rur

sum, Pacem meā do uobis, pacem relinquo uobis. Auditis quid relinquat suis: num equos: num satellitium: num imperiū: num opes: nihil horū. Quid igitur: pacē dat, pacē relinquit, pacē cum amicis, pacē cum inimicis. Iam illud mihi consyderes uelim, quid a cœna mystica, iam imminente mortis tempore, supremis illis precibus flagitarit a patre. Rem opinor, haud uulgarē poposcit, qui se sciebat impetraturum quicquid peteret, Pater inquit, sancte, serua eos in nomine tuo, ut sint unum, sicut & nos. Vide quæso, quam insignem concordia exigat in suis Christus, non dixit ut sint unanimes, sed ut sint unū, neq; id quocunq; modo, sed sicuti nos, inquit, unū sumus, qui perfectissima & ineffabili ratione sumus idē & illud obiter indicans, hac una uia seruandos esse mortales, si mutuam inter sese pacem aluerint. Porro quod huius mundi principes, insigni quopiam suos notant, quo possint a cæteris dignosci, præsertim in bello uide qua tandem nota Christus insignierit suos, non alia uis delictet, q̃ mutuæ charitatis. Hoc inquiens argumento cognoscent homines uos esse meos discipulos, non si sic, aut sic uestiamini, non si his, aut his uescamini cibis, non si tantum ieiunetis, non si tantum psalmorum exhauseritis, sed si dilexeritis inuicem neq; id sane uulgari modo, sed quemadmodum ego dilexi uos. Innumera sunt philosophorum præcepta uaria sunt Moyse, plurima regum edicta, unicum est, inquit, præceptum meum, ut ametis inuicem. Idem orandi formam suis præscribens, nonne in ipse statim initio, mire admonet concordia christiana, pater inquit, noster unius est precatio, una cōmunis omnium est postulatio, una domus, eademq; familia sunt omnes, ab uno patre pendent o-

PACIS QVERIMONIA

omnes, & qui conuenit eos iugibus bellis inter sese con-
 flictaris? Quo ore compellas communem patrem, si in
 fratris tui uiscera ferrū stringis? Iam quoniā unum hoc
 uoluit altissime insidere suorum animis, quot symbolis
 quot parabolis, quot præceptis concordiae studium in-
 culcauit? Se pastore uocat, suos oues, Et obsecro, quis
 unquā uidit oues pugnantes cum ouibus? Aut quid fa-
 ciunt lupi, si grex ipse semet inuicem lacerat? cum se ui-
 tis stirpem uocat, suos uero palmites, quid aliud quā ex-
 pressit unanimitatē? Portentū uideatur, piaculis procu-
 randum, si in eadem uite palmes cum palmite bellet, &
 ostentum non est, si Christianus pugnet cum Christia-
 no? Postremo si quid omnino Christianis sacrosanctū
 est, certe sacrosanctum esse debet, ac penitus animis il-
 lorū insidere, quæ Christus extremis illis mandatis tra-
 didit, ueluti testamentum condens, ac filiis ea cōmen-
 dans, quæ cuperet illis nunquā uenire in obliuionē. Aut
 quid aliud in his, docet, mandat, præcipit, orat, nisi mu-
 tuum inter ipsos amorem? Quid illa sacrosancti panis,
 & calicis philotesij cōmunio, nisi nouam quandam &
 indissolubilem concordiam sanxit? Caterum quando
 sciebat nō posse constare pacem, ubi de magistratu, de
 gloria, de opibus, de uindicta certamen est, tu penitus
 affectus eiusmodi reuellit ex animis suorum, uetat in to-
 tum ne malo resistent, iubet ut & de male merentibus
 bene mereant si possint, bene precentur, male precanti-
 bus. Et Christiani sibi uidentur, qui ob quantumuis le-
 uem iniuriolam, magnam orbis partem in bellum per-
 trahunt? præcipit ut qui in suo populo sit princeps, is
 ministrum agat, nec alia re præcellat alijs, nisi quod me-
 lior sit, & pluribus prosit, Et nō pudet quosdā ob pusilla

lam accessiunculā regni pomœrijs addendā, tantos cie
 re tumultus? Docet auum & liliorum ritu in diem uiue
 re. Verat sollicitudinem in posterum diem extendere,
 uult totos e cœlo pendere, diuites omnes excludit a re
 gno cœlorum, & non uerentur quidā ob pecuniolam
 non exolutam, fortasse nec debitam, tantū humani san
 guinis effundere. Atq; his temporibus hæ uel iustissi
 mæ suscipiendi belli causę uident̃. Profecto haud aliud
 agit Christus, iubens ut unum quiddam a se discant, mi
 ti esse animo, minimeq; feroci, cū iubet relinqui donas
 rium ad aram, nec prius offerri, q̃ cum fratre reditum
 sit in gratiam, nonne palam docet rebus omnibus ante
 ponendam esse concordiam, nec ullam uictimam esse
 deo gratam, nisi cōmendante me? Respuebat deus Iu
 daicum munus, fortassis hædū, aut ouem, quod a dissī
 dentibus offerret̃, & Christiani sic inter sese belligeran
 tes, sacrosanctam illam uictimam audent offerre? Iam
 cum se gallinæ pullos sub alas aggreganti facit ad simis
 lem, q̃ apto symbolo depinxit concordiam? Ille cōgres
 sator est, & qui cōuenit Christianos esse miluios? Eo
 dem pertinet quod lapis dictus est angularis, utrumq;
 parietem cōmittens & continens, & qui cōuenit ut hu
 ius uicarij totū orbem ad arma cōmoueant, regnaq; re
 gnis cōmittant? Summū illum conciliatorē habēt prin
 cipem, ut iactant, & nullis rationibus ipsi sibi possunt
 reconciliari. Conciliauit ille Pilatum & Herodem, & su
 os in concordia redigere nō potest? Petrum adhuc se
 m̃ iudæum, qui in præsentis capitis discrimine domi
 num, ac præceptorem tueri parabat, obiurgat ipse qui
 defendebatur, gladiumq; iubet recondere, & Christiani
 nis ob leuissimas causas nunquā nō expromptus distri

PACIS QVERIMONIA

Etusq; est gladius, idq; in Christianos. An ille se gladij
 præsidio defensum uelit, qui moriens deprecatur pro ne-
 cis authoribus? Omnes Christianorū literæ, siue uetus
 legas testamentū, siue nouū, nihil aliud q̃ pacē & una-
 nimitatē crepant, & om̃is Christianorū uita nihil aliud
 q̃ bella tractat. Quænam est hæc plusq; ferina feritas,
 quæ tot rebus nec uinci potest, nec leniri? Quin potius
 aut Christianorum titulo gloriari desinant, aut Christi
 doctrinam exprimant concordia. Quousq; uita pugna-
 bit cum nomine? Insignitæ quantūlibet, ædes, uestesq;
 crucis imagine, non agnoscet Christus symbolum, nisi
 quod ipse præscripsit, uidelicet concordie. Congregati
 uident euntē in cœlū, cōgregati iubentur opperiri spi-
 ritum cœlestē, Et inter congregatos se semper uersaturus
 promiserat, ne quis speraret usquā in bellis adesse
 Christum. Iam igneus ille spiritus, quid aliud est q̃ cha-
 ritas? Nihil igne cōmunius, citra dispendiū ullum ignis
 igni accenditur. Vis autem cognoscere spiritum illum
 concordie parentem esse? exitū uide. Erat inquit, cun-
 ctis cor tuum, & anima una. Tolle spiritum e corpore,
 continuo delabitur omnis illa membrorum compago.
 Tolle pacem, & perit omnis Christianæ uitæ societas.
 Tot hodie sacramentis infundi cœlestem spiritum affir-
 mant Theologi. Si uerum prædicant, ubi peculiaris spi-
 ritus illius effectus, cor unum & anima una? Sin fabu-
 læ sunt, cur tantum honoris hisce rebus defertur? Atq;
 hæc sane dixerim, quo magis Christianos suorum mo-
 rum pudeat, non quo sacramentis aliquid detrahā.
 Nam quod populum Christianū ecclesiam uocari plas-
 cuit, qd aliud q̃ unanimittatis admonet? Qui conuenit
 castris & ecclesiæ? Hæc aggregationem sonat, illa dissis-

dium, si pars ecclesie gloriari esse, quid tibi cum bellis? si ab ecclesia semotus es, quid tibi cum Christo? Si eadem omneis habet domus, si communem habetis principem, si eidem militatis omnes, si sacramentis eiusdem estis initia ti, si eiusdem gaudetis donatiuis, si eiusdem alimini stipendijs, si comune petitur præmium, quid ita inter uos tu multuamini? Videmus inter impios istos commilitones, qui mercede ad cædis peragenda ministerium condu cti ueniunt, tantam esse concordiam, non ob aliud, nisi quod sibi eiusdem militant signis, & pietatem profitentes tot res non conglutinant? Ita ne nihil agitur tot sacra mentis? Baptismus communis omnium, per hunc Chris to renascimur, & execti mundo, Christi membris inse rimur. Quid autem tam idem esse potest, quam eiusdem corporis membra? Ab hoc igitur, neque seruus est quis quam, neque liber, neque Barbarus, neque Græcus, neque uir neque foemina, sed omnes idem in Christo sunt, qui omnia redigit in concordiam. Scythas ita iungit, paululum san guinis utrinque gustati e calice, ut pro amico nihil con cidentur & mortem oppetere, Ethnicis etiam sancta est amicitia, quam mensa communis conciliauit, & Christia nos, coelestis ille panis, ac mysticus ille calix non conti net in amicitia? quam ipse sanxit Christus, quam illi quo tidie renouant, ac repræsentant sacrificijs. Si nihil illic egit Christus, quorsum opus hodie tot ceremonijs? si rem seriam egit, cur sic a uobis negligitur, quasi rem lu dicram, ac scenicam egerit? Audet quisquam ad sacrâ illam mensam amicitiae symbolum, audet ad pacis con uiuium accedere, qui bellum destinat in Christianos, et eos parat perdere, pro quibus seruandis mortuus est Christus? eorum haurire sanguinem, pro quibus suum

sub

PACIS QVERIMONIA

sanguinem fudit Christus? O pectora plusq̃ adamantina, in rebus tam multis consortium est, & in uita tam inexplicabile dissidium. Eadem nascendi lex omnibus, eadem senescendi, moriendiq̃ necessitas. Eundem generis principem habent omnes, eundem religionis auctorem, eodem omnes redempti sanguine, ñsdē omnes initiati sacris, ñsdē aluntur sacramentis. quicquid ex his redit muneris, ab eodē proficiscitur fonte, & ex æquo cōmune est omnibus. Eadem omnium ecclesia, deniq̃ præmium idem omnium. Quin cœlestis illa Hierusalē, ad quā suspirant uere Christiani, a pacis uisione nomen habet, cuius interim ecclesia typum sustinet. Et qui sit, ut hæc tantopere discrepet ab exēplari? Adeo nihil promouit tot uis solers natura, nihil ipse Christus perfecit tot præceptis, tot mysterijs, tot symbolis? Vel ipsa mala conciliant & malos, iuxta prouerbium, Christianos inter se nec bona, nec mala ulla conciliant. Quid humana uita fragilius, quid breuius? quot ea morbis, quot casibus obnoxia? Et tamen cum plus habeat ex sese malorum, q̃ ut ferri possit, tamen maximam malorum partem ipsi sibi accersunt dementes. Tanta cæcitas humanos animos occupat, ut nihil horum perspiciat, sic præcipites aguntur, ut omnia naturæ, Christi q̃ uincula omnia fœdera rumpant, dissecent, diffringant. Pugnant passim, atq̃ assidue, nec modus nec finis. Collidit gens cum gente, ciuitas cum ciuitate, factio cū factione, princeps cum principe, & ob duorum homuncionum, qui mox uelut ephemera sint interituri, seu stultitiā, seu ambitionem, res humanæ sursum, ac deorsum miscentur. Missas faciam ueterum bellorum Tragœdias, Repetamus decem ab hinc annis acta, ubi non gentium crude

DES. ERAS. ROTEROD. AVTORE.

lissime pugnātū est terra, marique: Quæ regio non Christiano sanguine cōmaduit: Quod flumen, quod mare, non humano cruore tinctum est: Et o pudor, pugnant immanius, q̃ ludæi, q̃ Ethnici, q̃ feræ. Quicquid bellorum ludæis gestū est aduersus Allophylos, id Christianis gerendum aduersus uitia, quibus nunc uitij conuenit, cum hominibus bellum est. Et tamen ludæos diuina iussio ducebat ad pugnā. Christianos, si prætexitibus detractis, rem uere æstimes, transuersos rapit ambitio, agit ira pessimus consultor, pertrahit habendi nunq̃ satiata cupiditas. Atq̃ his fere cum exteris res erat, Christianis cum Turcis fœdus est, inter ipsos bellū, iam Ethnicos tyrannos, fere gloriæ sitis ad bellum extimulabat atq̃ hi tñ sic Barbaras atq̃ efferas nationes subigebant, ut uinci expediret, & uictor de uictis bene mereri studeret. Dabant operam, ut q̃ fieri posset, incruenta esset uictoria, quo simul & uictori honesta fama præmiū esset, & uictis solatium, uictoris benignitas. At pudet meminisse, q̃ pudēdis, q̃ friuolis de causis, Christiani principes orbē ad arma concitent. Hic obsoletū ac putrē aliquē titulū, aut reperit, aut cōmentus est, Quasi uero ita magni referat, quis regnū administret, modo publicis cōmodis recte cōsulat. Ille causat omissum nescio quid in fœdere centum capitū. Hic illi priuatim insensus est, ob sponsam interceptam, aut scomma liberius dictum. Et quod est omnium sceleratissimum, sunt qui tyrānica arte, quod populi concordia potestatem suam labefactari sentiant, dissidio stabiliri, subornent qui data opera bellum excitent, quo simul & coniunctos dirimant, & infœlicem populū licētius expilent, scelestissimi quidam, qui populi malis aluntur, & quibus pacis tempore

confundatur

PACIS QVERIMONIA

re, non multum est quod agant in Republica. Quæ tarena furia uenenum hoc in pectus Christianum potuit immittere? Quis hanc tyrannidem docuit Christicolas quam nec Dionysius ullus, nec Mezētius ullus nouit? Beluæ uerius quam homines, & sola tyrannide nobiles nec usq; cordati nisi ad nocendū, nec unquā concordēs nisi ad opprimendam Rempublicā. Et hæc qui gerunt, pro Christianis habētur, audent humano sanguine undiq; polluti, ad sacras ædes, ad sacras aras accedere? O pestes in extremas insulas deportandas. Si Christiani, corporis unius membra sunt, cur non gratulatur quisq; alienæ foelicitati? Nunc prope iusta mouendi belli causa uidetur, regnum finitimū, rebus omnibus paulo florentius. Etenim si uerum fateri uolumus, quid aliud cōmouit, & hodie cōmouet tam multos ad armis lacessendum Franciæ regnum, nisi quod est unum omnium florentissimū? Nullū latius patet, nusq; senatus augustior, nusquam Academia celebrior, nusquam concordia maior, & ob hoc ipsum potestas summa. Nusquā æque florēt leges, nusquam illibatio religio, nec ludæorum cōmertio corrupta, uelut apud Italos, nec Turcarū aut Maranorum uicinia infecta, quemadmodum apud Hispanos & Hungaros. Germania, nūquid dicam de Bohæmis, i tot regulos dissecta est, ac regni ne species quidem ulla. Sola Francia ceu flos illibatus Christianæ ditionis, & uelut arx quædam tutissima, si qua fors tempestas ingruat, tot modis impetitur, tot artibus incessitur nec ob aliud, nisi cuius gratia conueniebat gratulari, si qua uena Christianæ mentis esset in istis. Atq; his tam impijs factis prætexitur titulus pius, sic sternunt uiam ad propagandum imperium Christi. O rem monstrosam

tam, parum consultum putant Reipublicæ Christianæ
 nisi pulcherrimam, ac foelicissimam ditionis Christianæ
 partem subuerterint. Quid quod in his tractandis feras
 etiam ipsas feritate præcedunt. Non pugnant beluæ,
 nec ferarum nisi in diuersum genus conflictatio est, quæ
 admodum & ante diximus, sæpius inculcandum, quo
 magis inhæreat animis. Viperæ non mordet uiperam,
 nec Lynx lyncē discrepît. Ac rursus ille cum pugnât
 suis pugnant armis, Illas armauit natura, homines iner-
 mes natos. O deum immortalē, qualibus armis armat
 ira? Tartareis machinis impetunt Christiani Christia-
 nos. Quis em̃ credat Bōbardas, hois inuentū esse? Nec
 ille tam densis agminibus in mutuū exitiū ruunt. Quis
 nunc uidit decē leones cum decem tauris congregat?
 At quoties uiginti millia Christianorum, cum totidem
 Christianis ferro decerdant? Tanti est lædere, tanti est
 haurire sanguinē fratrum. Nec illis fere bellū est, nisi cum
 famēs, aut cura sobolis in rabiem agit, At Christianis q̃
 tam leuis iniuria est, ut nō uideatur idonea bellandi oc-
 casio? Si faceret ista plebes, utcunque prætexi poterat
 inscitia, Si iuuenes, excusari poterat ætatis imperitia, Si
 prophani, nonnihil eleuaret atrocitatem facti personæ
 qualitas. Nunc ab hīs potissimum uidemus oriri bello-
 rum semina, quorum consilio moderatio neque popu-
 li motus componi conueniebat. Contemptum illud &
 ignobile uulgus, condit egregias urbes, conditas ciuili-
 ter administrat, administrando locupletat. In has irres-
 punt satrapæ, & ceu furi, quod aliena partum est indu-
 stia, surripiunt, & quod a plurimis bene congestum, est
 a paucis male dissipatur, quod recte conditū, crudelissi-
 me diruitur. Quod si præca non meminerunt, repetat,

precedunt

PACIS QVERIMONIA.

Inclina
 qui uolet, secum hisce duodecim annis gesta bella, Cair-
 fas expendat, comperiet omnia principum gratia, susce-
 pta, magno populū malo gesta, cum ne tantillum quis-
 dem ad populū attinerēt. Iam quod olim fœdum has
 bebatur apud Ethnicos, caniciem galea premere, ut in-
 quit ille, id apud Christianos laudi ducitur. Turpe se-
 nex miles Nasoni, & istis magnifica res est bellator ses-
 ptuagenarius. Immo ne sacerdotes quidem ipsos pu-
 det, quos olim deus nec in sanguinaria illa & inclemen-
 ti lege Moyli uoluit ullo sanguine pollui, non pudet
 Theologos Christianæ uitæ magistros, non pudet ab-
 solutæ religionis professores, non pudet episcopos, nō
 pudet cardinales & Christi uicarios, eius rei authores,
 ac faces esse, quam Christus tantopere detestatus est?
 Qui cōuenit mitræ & galeæ? Quid pedo cum gladio?
 Quid euangelico codici cum clypeo? Qui conuenit
 pacis omnine salutare populū, & orbem ad turbulen-
 tissimas pugnas cōcitare? pacem dare lingua, rebellum
 immittere? Tun eodem ore, quo Christum pacificum
 prædicas, bellum laudas, eademq; tuba deum canis &
 Sathanam? Tun apud concionem sacram, cuculla te-
 ctus, ad eadē incitas simplicem populū, qui ex ore
 tuo doctrinam expectabat euangelicam? Tun aposto-
 lorum occupans locum, pugnantia doces cum aposto-
 lorum præceptis? An non uereris, ne quod de Christi
 præconibus dictum est, Quam speciosi pedes nuntian-
 tium pacem, nuntiantium bona, nuntiantium salutem,
 in diuersum uertatur, quam fœda lingua sacerdotum,
 adhortantium ad bellum, incitantium ad mala, prouo-
 cantium ad perniciem? Apud Romanos adhuc impie
 pios, qui pontificatum maximum iniret, ex more cono-

firmabat iureiurando, se manus ab omni sanguine puras seruaturum, adeo ut ne læsus quidem ulcisceretur. Atq; huius sacramenti fidem constanter præstitit Titus Vespasianus, imperator Ethnicus, idq; laudi datur a scriptore Ethnico. At proflus sublatam e rebus humanis frontem, apud Christianos deo dicati sacerdotes, & qui his quoq; sanctius aliquid præ se ferunt monachi, ad cædes, ad strages inflammant, Et euangelij tubam, Martis tubam faciunt, obliti dignitatis suæ, sursum ac deorsum cursitant, nihil non tum faciunt, tum patiuntur, dum bellum excitent. & per hos principes alioqui fortassis quieturi, ad pugnam inflammantur, quorum autoritate tumultuantes sedari conveniebat. Immo quod prodigiosius, belligerantur ipsi, idq; earum rerum gratia, quas & apud impios contempserunt philosophi, quarumq; contemptus proprius, ac peculiaris est uiris Apostolicis. Ante paucos annos, cum fatali quodam morbo mundus ad arma raperetur, euangelici præcones, hoc est, Minores ac Prædicatores e suggestu sacro classicum canebant, & ultro ad furiam propensos magis accendebant. Apud Britannos animabant in Gallos, apud Gallos animabant in Britannos, Omnes ad bellum instigabant. Ad pacem nemo prouocabat, præter unum aut alterum, quibus pene capitale fuit me uel nominasse. Cursitabant ultro citroq; sacrosancti præsules, & dignitatis & professionis suæ obliti publicum orbis morbum opera sua exacerbantes. tum hinc lulium pontificem Romanum, hinc Reges ad maturandum bellum instigantes, perinde quasi non satis ipsi sua sponte insanirent, & tamen hanc manifestariam insaniam magnificis titulis præteximus. Huc

PACIS QVERIMONIA

patrum leges, huc piorum hominum scripta, huc arcanæ scripturæ uerba impudentissime detorquemus, ne dicam impie. Immo iam eo prope redijt res, ut stultum & impium sit aduersus bellum hiscere, & id laudare, qđ solum ore Christi laudatum est. Parum consulere populo parum fauere principi uidetur, qui suaserit rem omnium saluberrimam, & ab omniū pestilentissima dehortetur. Iam ipsa castra sequuntur sacrifici, præsumt in castris episcopi, & relictis ecclesijs suis, Bellonæ rem agunt. Immo gignit iam bellū sacerdotes, gignit episcopos, gignit cardinales, quibus Campi legatus honorificis titulis & apostolorum successoribus dignus habetur. Quo minus mirum, si Martem spirant, quos Mars genuit. Et quo malum sit insanabilius, tantam impietatem pietatis specie prætexunt. Vexilla crucem habent Miles impius, & numis aliqt ad lanienā, ac eedē condūctus, crucis insigne præfert, & belli symbolum est, quod solum dedocere bellum poterat. Quid tibi cum cruce scelerate miles? istis animis, istis factis, dracones, tigrides, ac lupi conueniebant. Istud signum eius est, qui nō pugnando, sed moriendo uicit, qui seruauit, non perdidit, quodq; cum primis admonere te poterat, cum quibus hostibus tibi res sit, si modo Christianus es, & quaratione uincendum sit. Tu salute insigne gestas, ad fratris perniciem properans, & cruce perdis, qui cruce seruatus est? Quid quod ab arcanis illis & adorandis sacris, nam hæc quoq; pertrahuntur in castra, in quibus in primis summa Christianorum concordia repræsentatur, curritur in aciem, dirum ferrū in fratris uiscera stringitur, & facinoris omnium sceleratissimi, quo nō aliud esse potest impijs spiritus gratius, Christum faciunt spe-

ctatorem, si tamē illic dignatur adesse Christus. Deniq;
 quoq; est omnium absurdissimum, in utrisq; castris in
 utraq; acie, crucis signum relucet, in utrisq; sacra. Quid
 hoc monstri est? pugnat crux cum cruce, Christus ad-
 uersus Christum belligeratur. Hoc signum Christiani
 nominis hostes terrere solet, Cur nunc oppugnant, qđ
 adorant? homines non una digni cruce, sed uera. Quæ
 so, quid in hisce sacris orat miles, pater noster? Os du-
 rum, audes eum appellare patrem, qui fratris tui iugu-
 lum petis? Sanctificetur nomē tuum, Qui magis deho-
 nestari poterat nomen dei, quam istiusmodi inter uos.
 tumultibus? A dueniat regnum tuum, Sic oras, qui tan-
 to sanguine tyrannidē tuam moliris? Fiat uoluntas tua,
 quemadmodum in cœlo, ita & in terra, pacem uult ille
 & tu bellum paras. Panem quotidianum a cōmuni pa-
 tre petis, qui fraternas exuris segetes, & tibi quoq; ma-
 uis perire, quam illi prodesse? Iam quonam ore dices il-
 lud, Et dimitte nobis debita nostra, sicut & nos dimittis
 mus debitoribus nostris, qui ad parricidium festinas?
 Deprecaris periculum tentationis, qui tuo periculo fra-
 trem in periculum pertrahis. A malo liberari postulas,
 cuius instinctu, summum malum fratri machinaris? Pla-
 to negat appellandum bellum, quod Græci moueant
 aduersus Græcos, Seditio est, inquit. Et istis sanctum
 etiam bellum est, quod ob quaslibet causas tali milite,
 talibus armis, cum Christiano gerit Christianus? Ethni-
 corum leges, culleo insutum in profluentem abijciunt,
 qui ferrum fraterno sanguine imbuerit. An minus fra-
 tres sunt, quos Christus copulauit, quam quos sangui-
 nis propinquitās? Et tamen hic præmiū est parricidio.
 O miseram bellantium sortem. Qui uincit, parricida est:

PACIS QVERIMONIA

qui uincitur, perit. nihilo secius paricidio obnoxius, qđ
parricidium conatus est. Et post hæc execrantur Tur-
cas uelut impios, & a Christo alienos, quasi uero cum
hæc agunt, ipsi Christiani sint, aut quasi Turcis ullum
spectaculum exhiberi possit iucundius, quam si conspi-
ciant illos mutuis telis sese confodiētes. Immolant Tur-
cæ dæmonibus, at cum his nulla uictima sit acceptior,
quam si Christianus mactet Christianum, quæso, quid
aliud facis quā illi? Tum enim gemina fruuntur hostia
spiritus impij, cū pariter & q̄ inactat, & q̄ mactat, sit ui-
ctima. Si quis Turcis fauet, si quis amicus est dæmonis
bus, hostias huiusmodi frequenter offerat. Sed audio
iamdudum, quid excusent homines in suum ipsorum
malum ingeniosi. Cogi se queruntur, & inuitus ad bel-
lum pertrahi. Detrahe personā istam, abijce fucos, tuum
ipsius pectus consule, reperiēs iram, ambitionem, stul-
titiā huc pertraxisse, non necessitatem, Nisi forte hac
fine necessitatē metiris, si non per omnia satissiat animo
Ad populū phaleras, deus fucis nō deluditur. Atq; in-
terea solēnes agūtur supplicatiōes, magnis clamoribus
petitur pax, uociferantur immani boatu, ut pacē nobis
dones, te rogamus, audi nos. Nonne iure optimo, deus
istis responderit, Quid me ridetis? Rogatis ut depellā,
qđ ipsi uobis accersitis uolētes. Deprecamini, cuius ipsi
uobis estis authores. Si quælibet offensa bellum parit,
cui tandē nō est quod querať? Inter uxorē & maritū in-
cidunt, ad quæ sit cōniundū, nisi malis dirimi beneuo-
lentiā. Quod si quid eiusmodi sit ortū inter principes,
quid opus erat mox ad arma rapiť? Sunt leges, sunt ho-
mines eruditi, sunt uenerādi abbates, sunt reuerēdi epis-
copi, quorū salubri consilio tumultus rerum componi

poterat. Cur nō hos potius arbitros faciunt, quos haud possint tam iniquos nancisci, quin minore malo discesse furi sint, quam si armis experiātur? Vix ulla tam iniqua pax, quin bello uel æquissimo sit potior. Prius expens de singula, quæ bellū uel postulat uel adducit, & quantum lucri feceris intelliges. Summa Romani pontificis autoritas, Ast cum gentes, cum principes impijs bel lis tumultuantur, idq; annos aliquot, ubi tum pontificū autoritas, ubi potestas Christo proxima? Hic certe erat expromenda, nisi ipsi similibus tenerentur cupiditatibus. Vocat pōtifex ad bellum, paretur, Vocat idem ad pacem, cur non obtemperatur itidem? Si pacem mas lunt, cur Iulio bellandi authori tam alacriter obeditum est, Leoni ad pacem & concordiam p-rouocanti, uix quisqua m obtemperat? Si uero sacrosancta est Roma ni pontificis autoritas, certe maxime ualere par est, quoties ad id prouocat, quod unice docuit Christus. Cæterum quos Iulius ad bellum exitiale potuit exci tae, cum Leo sanctissimus pontifex, non idem possit, tot modis ad Christianam concordiam prouocans, de clarant sese, ecclesiæ prætextu, suis seruisse cupiditatis bus, ne quid dicam acerbius. Si ex animo tedet bellos rum, dabo consilium, quo concordia tueri possitis. So lida pax haud constat affinitatibus, haud foederibus hominum, ex quibus frequenter exoriri bella uidemus Repugnandi fontes ipsi, unde malum hoc scatet, prauæ cupiditates tumultus istos pariunt. Et dum quisq; suis inseruit affectibus, interim affligitur Respublica, nec ta men assequitur hoc ipsum quisq;, quod malis rationis bus affectat. Sapiant principes, & populo sapiant, non sibi ac uere sapiant, ut maiestatem suam, ut foelicitatem,

NB

indane non gano
 omni in no puy
 m

PACIS QVERIMONIA

ut opes, ut splendorem his rebus metiantur, quæ uere magnos & excellentes faciunt. Sint eo animo erga Rem publicam, quo pater erga familiam. Ita se magnum existimet rex, si quam optimis imperet, Ita foelicem, si suos foelices reddiderit, Ita sublimem, si quam maxime liberis imperet, Ita opulentum, si populum habeat opulentum, Ita florentem, si ciuitates perpetua pace florentes habeat. Atq; hunc principis animum imitentur proceres, ac magistratus, omnia Reipublicæ cōmodis metiantur, & hac uia rectius suis cōsulerint cōmodis. Rex qui hoc sit animo, num is facile cōmouebitur, ut pecuniam a suis extorqueat, quam Barbaro militi numeret? Suos ad famem adiget, ut impios aliquot duces ditet? Num is suorum uitam tot periculis obijciat? Non opinor. Hacenus exerceat imperium, ut meminerit se hominem imperare hominibus, liberum liberis, postremo Christianum Christianis. Huic uicissim tantum deferat populus, quatenus ad publicam utilitatem conducit. Non aliud exigit bonus princeps, Mali uero cupiditates retundet ciuium consensus, Absit utrinq; priuati cōmodi ratio. Plurimum honoris habeatur ijs, qui bellū excluserint, qui concordiam restituerint ingenio consilio suo. Deniq; qui hoc modis omnibus moliant, non ut maximam militum, ac machinarum uim comparet, sed ut ijs nō sit opus. Quod pulcherrimum facinus, tot imperatorum unus Diocletianus animo concepisse legitur. Quod si bellum uitari non potest, ita geratur, ut summa malorū in eorum capita recadat, qui belli dedere causas. Nunc principes tuti belligerantur, ductores hinc crescunt, maximè malorum pars in agricolas, ac plebem effunditur, ad quos nec attinet bellum, nec ipsi

maxima malorum
pars in agricolas
lay

DES. ERAS. ROTEROD. AVTORE.

belli causam ullam dederunt. Vbi principis sapientia, si hæc nō perpenditur? ubi principis animus, si hic leuiter ducit? Inueiunda ratio, qua fiet ne toties mutantur, ac uelut obambulent imperia, quod omnis rerum nouatio tumultum gignat, tumultus bellum. Id facile fiat, si regū liberi, intra ditionis fines elocentur, aut si quem libeat finitimis adiungere, spes omnibus successionis præcisa esto. Nec fas sit principi ditionis portionem ullam uendere aut alienare, perinde quasi priuata sint prædia, liberæ ciuitates. Nam liberæ sunt quibus rex imperat, Seruiunt quos tyrānus premittit. Nunc huiusmodi matrimoniorum uicibus fit, ut apud Hybernos natus, repēte imperet Indis, aut qui modo Syris imperabat, subito rex sit Britannia. Fitq; ut neutra regio principem habeat, dum priorem relinquit, & a posteriore non agnoscitur, nimirū ignotus, alioq; mundo natus. Atq; interim dum illud parit, dum euincit, dum stabilit, alterum exhaurit, proteritq; nonnunquam amittit utrunq; dum utrunq; complecti studet, uix alteri administrando idoneus, semel inter principes conueniat, quid quisq; debeat administrare, ac ditionis fines semel dados, nulla proferat aut contrahat affinitas, nulla conuellāt fœdera, ita suam quisq; portionem enitetur quam potest ornatissimam reddere, dum in unam omne studium intendet, hanc conabitur rebus optimis locupletatā suis liberis relinquere. Atq; hoc sane pacto futurum est, ut ubiq; floreat omnia. Cæterum inter sese, non affinitatibus, aut facticijs sodalitatibus, sed sincera, puraq; amicitia copulentur, maximeq; simili cōmuniq; studio bene merendi de rebus humanis. Principi uero succedat, uel q; genere proximus, uel qui populi suffragijs maxime iudicabit idos

maxime iudicabit idos

PACIS QVERIMONIA.

neus. Ceteris sat sit, inter honestos haberi proceres. Regium est nescire priuatos affectus, & omnia publicis commodis aestimare. Ad hæc longinquas peregrinationes uitet princeps, imo pomeria regni nunquam transire uelit, memineritque dicti longo sæculorum consensu probati, Frons occipitio prior est. Locupletatum se existimet, non si quid alijs ademere, sed si sua reddiderit meliora. Cum de bello agitur, ne adhibeat in consilium iuuenes, quibus ideo bellum placet, quod experti non sunt quantum habeat malorum, neue eos, quibus expedit turbare publicam tranquillitatem, quique populi calamitatibus aluntur, ac saginant. Senes cordatos & integros accersat, & quorum pietas patrie spectata sit. Nec temere ad unius aut alterius libidine bellum moueat, quod semel coeptum, haud facile finitur. Res omnium periculissima, non nisi totius populi consensu suscipiatur. Belli causæ statim prædicendi sunt. Ad quædam conueniendum, comitas comitatum adiungetur. Nonnunquam emenda pax. Ea si ratione subduxeris, quid bellum fuerit exhausturum, & quot ciues ab exitio serues, paruo empta uidebitur, etiam si magno emeris. Quando præter ciuium tuorum sanguinem, plus erat bello impendendum. In eas rationem, quantum malorum uitaris, quantum bonorum tuearis, & impendij non poenitebit. Fungatur interim suo officio præsules. Sacerdotes uere sint sacerdotes. Monachi professionis suæ meminerint. Theologi quod Christo dignum est, doceant. Conspirent omnes aduersus bellum, in hoc latent omnes. pacem publice priuatimque prædicent, efferant, inculcent. Tum si minus possint efficere, ne ferro decernat, certe ne probent, ne inter sint, ne rei uel tam scelerata, uel certe tam suspecta,

An sit parvynardū
principi

Rey p'mlofissi-
ma

produendū ac produendū

+

DES. ERAS. ROTEROD. AVTORE.

ipsis autoribus honos habeatur. Satis sit in bello cæsis,
in prophano sepulchrum dari. Si qui boni sunt in hoc
genere, qui certe paucissimi sunt, non ob hæc fraudan-
buntur suo præmio. Ceterum impij, quæ maxima tur-
ba est, minus sibi placebunt, honore detracto. De his bel-
lis loquor, quæ uulgo Christiani cum Christianis com-
mittunt. Nec enim idem sentio de his, qui simplici pioque
studio uim incurfantium Barbarorum depellunt, & suo
periculo publicam tranquillitatem tuentur. Nunc tro-
phæa sanguine tincta eorum, pro quorum salute Chris-
tus suum fudit sanguinem, reponuntur in templis, in-
ter apostolorum ac martyrum statuas, quasi post hac pium
sit futurum, non fieri martyres, sed facere. Abunde mas-
gnum erat hæc in foro, aut armario quopiam reposita
seruari, in sacras ædes, quas purissimas esse decet, nihil
recipi conuenit, quod sanguine sit inquinatum. Sacero-
dotes deo sacri, nusquam adsint, nisi ad dirimenda bel-
la. In hæc si consentiant, si eadem ubique inculcent, plu-
rimum habitura momenti est. Quod si hic fatalis est hu-
mani ingenij morbus, ut prorsus absque bellis durare
nequeat, quin potius malum hoc in Turcas effunditur
Tametsi præstabat & hos doctrina, beneque factis, uiteque
innocentia, ad Christi religionem allicere, quam armis
adoriri. Attamen si bellum, ut diximus, omnino uitari
non potest, illud certe leuius sit malum, quam sic impie
Christianos inter se committi, collidi que. Si mutua char-
ritas illos non adglutinat, certe coniunget utcumque com-
munis hostis, & qualiscunque synecretismus erit, ut ablit,
uera concordia. Postremo magna pars pacis est, ex ani-
mo uelle pacem. Quibus enim pax uere cordi est, hi
omnes pacis occasiones eripiunt, quæ obstant, aut ne

D ij

13
sed antiquitus in templis
reponebat uictoriae munera
id. Verum, sed in quibus sacri
ficebatur deo in istis, non deo

+ consensit auctoritas

Tu uel quomodo conuertendi

syncretismus

PACIS QVERIMONIA

gligunt, aut amoliuntur, permulta ferunt, dum tantum bonum sit incolume, Nunc ipsi bellorū seminaria quærunt, quod ad concordiam facit, eleuant, aut dissimulāt etiam, quod ad bellum tendit, ultro exaggerant, exulcerantq̃. Pudet referre, ex cuiusmodi nugis, quantas excitent tragoedias, & ex qua minuta scintillula, quæ rerū tempestates exoriantur. Tunc illud iniuriarum agmen uenit in mentem, & suum quisq̃ malum sibi exaggerat, At benefactorum interim profunda obliuio, ut iures affectari bellum, Et sæpe principum priuatum quiddam est, quod orbem ad arma compellit, At plusquam publicum esse debet, ob quod bellum suscipiatur. Quin ubi nihil subest causæ, ipsi dissidiorum causas sibi fingūt regionum uocabulis ad aliorum alimoniam abutentes, & hunc stultæ plebis errorem alunt magnates, & in suum abutuntur compendium, alunt sacerdotes quidam Anglus hostis est Gallo, nec ob aliud, nisi quod Gallus est. Scoto Britannus insensus est, nec aliam ob rem, nisi quod Scotus est. Germanus cum Franco dissidet, Hispanus cum utroq̃. O prauitatem, Dissungit inane loci uocabulum, Cur non potius tot res conciliant? Male uis Britānus Gallo. Cur non potius bene uis homini? Christianus Christiano? Cur res friuola plus apud istos potest, quā tot naturæ nexus? tot Christi uincula? Locus corpora dirimit, non animos. Separabat olim Rhenus Gallum a Germano, at Rhenus non separat Christianum a Christiano. Pyrenei montes Hispanos ab Italis seiungunt, at idem non dirimunt ecclesiæ cōmunionem. Mare dirimit Anglos a Gallis, at non dirimit religionis societatem. Paulus Apostolus indignatur audire inter Christianos has uoces, Ego sum Apol-

Io, ego sum Cephæ, ego sum Pauli, nec impia cognomina sinit secare Christum omnia conciliantem, & nos comune patriæ uocabulum grauem causam iudicamus, cur gens in gētis internicionem tendat? Ne id quidem satis non nullorum animis bellorū auidis, prauē dataq; opera dissidiorum ansas quærunt, ipsam diuidunt Galliā, & ea uocabulis distrahunt, quæ nec maria, nec montes, nec uera regionū nomina distrahunt. E Gallis Germanos faciunt, ne uel nominis consortio coalescat amicitia. Si in actionibus odiosis, uelut diuortij, nec litem facile recipit iudex, nec quamlibet admittit probationē cur isti in re omnium odiosissima quamlibet friuolam causam admittunt? Quinpotius id quod res est, cogitant, mundum hunc cōmunem esse patriam omnium, si patriæ titulus conciliat, ab iisdem maioribus ortos omneis, si facit amicos sanguinis affinitas. ecclesiā unam esse familiam, ex æquo cōmunem omnibus, si domus eadem copulat necessitudines. In hanc partem ingeniosos esse par est. Toleras quædam in focero, non ob aliud nisi quod focer est, & nihil toleras in eo, qui religionis consortio frater est? Multa condonas generis propinquitati, & nihil condonas affinitati religionis? Certe nullum uinculum arctius alligat, quam Christi sodalitas. Cur id solum ob oculos obuersatur, quod animū exulcerat? Si paci faues, sic cogita potius, in hoc læsit, sed sæpe alias profuit, aut alieno impulsu læsit. Postremo, quemadmodum apud Homerum dissidij causas, quod inter Agamemnonem & Achillem intercesserat in Aten deam reiiciunt, qui uocant ad concordiam, ita quæ excusari non possunt, aliquando satis imputentur aut malo cuipiā si libet Genio, & in hæc odium ab ipsis

PACIS QVERIMONIA

hominibus transscratur. Cur magis ad perniciem suam sapiunt, quā ad tuendam foelicitatem? Cur ad malum, quā ad bonum sunt occulatiores? Qui paulo cordatis ores sunt expēdunt, considerant, circūspiciunt, priusq̃ priuatum quoque negocium aggrediantur. Et clausis oculis præcipites in bellum ipsi sese cōficiunt, præsertim cum semel admissum, excludi non possit, quin e pu fillo sit maximum, ex uno plura, ex incruento cruentū. Maxime cum hæc procella, non unum aut alterum affligat, sed uniuersos pariter inuoluat. Quod si uulgis hæc parum expendit, certe principis & optimatū partes sunt, hæc secum reputare. Sacerdotum est ista ratio nibus omnibus infulcire, uolentibus, ac nolentibus ingerere. Hærebunt tandem si nusquam non audiantur. Ad bellum gestis primū inspicere, cuiusmodi res sit pax, cuiusmodi bellum, quid illa bonorum, quid hoc malorum secum uehat, atque ita rationem ineas, num expe diat pacem bello permutare. Si res quædam admirabilis est, regnum undiq̃ rebus optimis florens, bene conditis urbibus, bene cultis agris, optimis legibus, honestissimis disciplinis, sanctissimis moribus cogita tecum hæc foelicitas mihi perturbanda est, si bello. Contra si quando conspexisti ruinas urbium, dirutos uicos, exusta phana, desolatos agros, & id spectaculum miserandum ut est, uisum est, cogita hunc esse belli fructum. Si graue iudicas sceleratū conductitiorum militum colluuiem in tuam regionem inducere, hos ciuium tuorū malo alere, his inseruire, his blandiri, immo horum arbitrio teipsum, ac tuam columitatem committere, fac cogites hanc esse belli conditionem, si abominaris latrocinia, hæc docet bellum, si execraris parricidium, hoc in

bello discitur. Nam qui uereatur unum occidere com-
motus, qui leui autoramento conductus, tot homines
iugulat? Si præsentissima reipublice pestis est, legum
neglectus, silent leges inter arma. Si scædum existimas
stuprum, incestum, & his turpiora, horum omnium bel-
lum magister est. Si fons omnium malorum est impie-
tas, & religionis neglectus, hæc belli procellis prorsus
obruitur. Si iudicas pessimum esse Reipublice statum,
cum plurimum possunt, qui pessimi sunt, in bello regnât
sceleratissimi, & quos in pace suffigas in crucem, ho-
rum in bellis primaria est opera. Quis enim melius per
deuia ducet copias, quam latro exercitatus? Quis fors-
tius diripiet ædes, aut spoliabit templa, quàm parietum
perforator, aut sacrilegus? Quis animosius feriet hostem,
& hauriret ferro uitalia, quam gladiator, aut parricida?
Quis æque idoneus ad iniiciendum ignem urbibus, aut
machinis, quàm incendiarius? Quis æque contînet flu-
ctus, marisque discrimina, ac pirata diutinis prædationis
bus exercitus? Vis palam cernere, quam res sit impia
bellum, animaduerte per quos geritur. Si pio principi
nihil antiquius esse debet, quàm suorum incolumitas, huic
bellum in primis inuisum sit, oportet. Si principis foelici-
tas est imperare filiabus, pacem potissimum amplecti
debet. Si præcipue optandum bono principi, ut impe-
ret quam optimis, bellum detestetur oportet, unde sca-
tet ois impietatis sentina. Si suas opes esse putet quic-
quid ciues possident, bellum omnibus rationibus uitet,
quod ut foelicissime cadat, certe facultates omnium atte-
rit, & quod honestis artibus partum est, in imanes quoso-
dam carnifices erogandum. Iam illud etiam atque etiam
perpendat, suam cuique blandiri causam, & suam cuique

PACIS QVERIMONIA

spem arridere, cū illa sæpenumero pessima sit, quæ cō-
 moto uideatur æquissima, & hæc non raro fallit. Sed
 finge causam iustissimam, finge exitum belli prosperi-
 mum, rationem fac ineas, omnium incōmodorum, qui-
 bus gestum est bellum, & cōmoditatum quas peperit
 uictoria, & uide num tanti fuerit uincere. Vix unquam
 uictoria contingit incruenta. Iam habes tuos humano
 sanguine pollutos. Ad hæc supputa morum, publiceꝝ
 disciplinæ iacturam, nullo compendio sarcendam. Ex
 hauris tuum fiscum, expilas populum, oneras bonos,
 ad facinus excitas improbos, neꝝ uero confecto bello
 protinus & belli reliquiæ sopitæ sunt. Obsolescunt ar-
 tes, includuntur negociatorū cōmercia. Vt hostem in-
 cludas, prius temetipsum a tot regionibus cogeris ex-
 cludere. Ante bellū omnes finitimæ regiones tuæ erant
 pax enim rerum cōmercijs facit omnia cōmunia. Vide
 quantam rem egeris, nunc uix tua est, quæ maxime tua
 est ditio. Vt oppidulum excindas, quot machinis, quot
 tentorijs opus est? Imitatitiam urbem facias oportet, ut
 ueram euertas, at minoris aliud uerum oppidū extrui
 poterat. Ne liceat hosti prodire ex oppido, tu exul a pa-
 tria sub dio dormis. Minoris constaturum erat, ædificas
 re noua mœnia, quam ædificata machinis demoliri. Vt
 ne computem hic, quod pecuniarum effluit inter exi-
 gentium, recipientiū, ac ducum digitos, quæ sane pars
 est non minima. Quod si horum singula ad uerum cal-
 culum reuoces, ni compereris decima impendiorum
 parte pacē redimi potuisse, patiar æquo animo me pro-
 fligari undiqꝫ. Sed parum excelsi animi tibi uideare, si
 quid remittas iniuriarum, immo nullum est certius ar-
 gumentum humilis animi, minimeꝝ regiꝝ, quam ulcisci

DES. ERAS. ROTEROD. AVTORE.

Maieſtati tuę non nihil decedere putas, ſi cum ſinitimo
 principe agens, & fortaffe cognato, aut affini, fortaffis
 alias bene de te merito, de tuo iure decedas aliquantulus
 lum. At quanto humilius deſcis maieſtatē tuam, dum
 barbaris cohortibus, & infimę ſcleratorum feci, nun
 quam explendę auro ſubinde litare cogeris? dum ad
 Cares uiliſſimos, ſimul ac nocentiſſimos, blandus ac
 ſupplex mittis legatos, dum tuum ipſius caput, dum
 tuorum fortunas, illorum credis fidei, quibus nihil eſt,
 neq; penſi, neq; ſancti. Quod ſiquid iniquitatis uidebi
 tur habere pax, caue ſic cogites, hoc perdo, ſed tanti pa
 cem emo. At dixerit argutior aliquis, Facile donarim,
 ſi res ad me priuatim pertineat. Princeps ſum, negoci
 um publicum, uelim nolim, ago. Non facile bellum ſu
 ſcipiet, qui nihil niſi publicum ſpectat. At qui contra
 uidemus omnes belli cauſas ex hiſ rebus naſci, quę ni
 hil ad populum pertineant. Vis hanc, aut illam ditio
 nis partem vindicare? Quid iſtud ad populi negoci
 um? Vis ulciſci, qui filię renuntiauit, quid hoc ad rem
 publicam? Hęc expendere, hęc perſpicere, uere ſapi
 entis, uereq; magni eſt principis. Quis vnquam aut la
 tius imperauit, aut ſplendidius Octauio Auguſto? at
 is cupiebat etiam deponere imperium, ſi quem uidiſſet
 Reipublice magis ſalutarem principem. Merito lauda
 ta eſt ab egregijs autoribus uox illa cuiuſdam impera
 toris. Pereant inquit filij mei, ſiquis alius melius ſit Rei
 publice conſulturus. Hos animos Reipublice, præſti
 terunt homines impij, quod ad Chriſti religionem atti
 ner, & Chriſtiani principes uſq; adeo uilem ducunt po
 pulum Chriſtianum, ut grauiffimo orbis incendio pri
 uatas ſuas cupiditates, uel ulciſci uelint, uel explere?

PACIS QVERIMONIA.

Iam audio quosdam ita tergiuersantes, ut negent se tutos esse posse, nisi uim improborum acriter propellant. Cur igitur inter innumeros Imperatores Rhomanos, soli Antonini, pius & philosophus petiti non sunt? Nisi quod nemo tutius regnat, quā qui paratus est & deponere, utpote quod reipublice gerat, non sibi. Quod si nihil uos mouet, neq; naturæ sensus, neq; pietatis respectus, neque tanta calamitas, certe Christiani nominis probrum, animos uestros in concordiam redigat. Quota mundi portio tenetur a Christianis? Atq; hæc tamen est illa ciuitas in ædito monte sita, spectaculum facta deo & hominibus. Ad quid sentire putandū est, quid loqui, quæ probra in Christum euomere Christiani nominis hostes, ubi uident Christianos sic inter sese concertare, leuioribus de causis, quam Ethnicis, crudelius quam impij, machinis tetrrioribus quam ipsi? Quorum inuētum est bombardæ? Nonne Christianorum? Et quo res sit indignior, his induuntur Apostolorū nomina, insculpuntur imagines. O crudelis irratio. Paulus ille pacis hortator perpetuus, tartaream machinam torquet in Christianum? Si cupimus Turcas ad Christi religionem adducere, prius ipsi simus Christiani. Nunquam hoc illi credent, si quod est perspiciant nusquam magis sæuire, quam apud Christianos, id quod Christianus unum omnium maxime detestatus est. Et quod Homericus Ethnicus demiratur in Ethnicis, cum suauium etiam rerum satietas sit, somni, cibi, potus, choreæ, muresces, belli infœlicis nullam esse satietatem. Id apud eos uerissimum est, quibus ipsum etiam belli uocabulum abominandum esse oportuit. Roma furiosa quondam illa bellatrix, tamen lani sui templum aliquotiens uidit

clausum. Et qui conuenit apud uos nullas esse bellandi
ferias? Quo nam ore prædicabitis eis Christum pacis
autorem, ipsi perpetuis dissidijs inter uos tumultuan-
tes? Iam quos putatis animos addit Turcis uestra dis-
cordia? Nihil enim facilius quam uincere dissidentes.
Vultis illis esse formidabiles? Concordes estote. Cur
ultro uobis & præsentis uitæ iucunditatem inuidetis,
& a futura foelicitate uultis excidere? Multis malis per
se obnoxia est uita mortalium, magnam molestiæ par-
tem adimet concordia, dum mutuis officijs alius alium
aut consolatur, aut iuuat. Si quid boni obtinget, id tum
suauius, tum communius reddet concordia, dum ami-
cus impartit amico, & beneuolus beneuolo gratulat.
Qam friuola sunt, quæq; mox peritura, pro quibus in-
ter uos tumultus est, mors omnibus imminet, non mi-
nus regibus, quam plebeijs. Quos tumultus ciet ani-
malculum, mox sumi in morem euaniturum? In foribus
adest æternitas. Quorsum attinet, pro rebus istis um-
braticis, perinde moliri, quasi uita hæc esset immortalis
Omiseros, qui foelicem illam piorum uitam non cre-
dunt, aut non sperant impudentes, qui sibi pollicentur,
e bellis ad eam iter esse, cum illa nihil sit aliud, quam in-
effabilis quædam foeliciū animorum cōmunio, cum
iam ad plenum continget, quod Christus tam enixe ro-
gauerat patrem cælestem, ut sic inter se iungerent illi,
quemadmodum ipse patri iunctus esset. Ad hanc sum-
mam concordiam, qui possitis esse idonei, nisi eam inte-
rim pro uirili meditemini? Vt non subito ex spurco,
Heluone sit angelus, Itaque non subito ex bellatore
sanguinario, Martyrum, ac Diuorum socius. Eia satis
iam, superque fufum est Christiani, si parum est, hus

PACIS QVERIMONIA

mani sanguinis, fatis in mutua debacchatum exitia, fatis haecenus Furijs. Orcoq; litatum, fatis diu quæ Turcarum pascant oculos, acta est fabula. Saltem aliquando post nimium diu toleratas bellorum miseras resipiscite. Quicquid haecenus insanitum est, fatis imputetur, placeat Christianis, quæ quondam prophanis placuit, superiorum malorum obliuio. Posthac communibus consilijs in pacis studium incumbite. Et sic incumbite, ut non stuppeis, sed solidis atq; adamantinis uinculis coeat, nunquam dirumpenda. Vos appello principes, de quorum nutu potissimum pendentes res mortalium, qui Christi principis imaginem inter mortales geritis, agnoscite regis uestri uocem, ad pacem uocatis, existimate totum orbem diutinis fessum malis, hoc a uobis flagitare. Si quid cui dolet etiam, æquum est hoc publice omnium felicitati donare. Maius est negocium, quam ut leuibus causis debeat retardari. Appello uos sacerdotes deo sacri, hoc studijs omnibus exprimate, quod deo gratissimum esse scitis, hoc depellite, quod illi maxime inuisum. Appello uos theologi, pacis Euangelium prædicare, hanc semper popularibus auribus occinite. Appello uos episcopi, alijsq; dignitate ecclesiastica præmuniētes, ad pacem æternis uinculis astringendam uestra ualeat autoritas. Appello uos primates, & magistratus ut sapientiæ Regum, ut pietati Pontificum uestra uoluntas sit adiutrix. Vos appello promiscue, quicumq; Christiano nomine censemini, consentientibus animis in hoc conspirete. Hic ostendite quantum ualeat aduersus potentem Tyrannidem multitudinis concordia. Huc pariter omnes omnia sua conferant. Iungat æterna concordia, quos tam multis rebus coniunxit natura, pluribus


DES. ERAS. ROTEROD. AVTORE.


Christus. Communibus studiis agant omnes, quod ad omnium ex æquo felicitàtem pertinet. Huc inuitant omnia, primum ipse naturæ sensus, atq; ipsa, ut ita dicam. hūanitas. Deinde totius humanæ felicitàtis princeps & autor Christus, Ad hæc tam multa pacis comoda, tot belli calamitates. Vocāt huc ipsi principum animi, iam uelut afflante deo, ad concordiam propensi. En pacificus ille, placidusq; LEO, signum omnibus extulit ad pacem inuitans, uereq; Christi uicarium agens. Si uere oues estis, sequimini pastorem. Si filij, audite patrem. Vocat huc ille non titulo tantū Christianissimus Galliarum Rex Franciscus, qui pacem nec emere grauat, nec usquam sue maiestatis habet rationem, modo publicæ paci consulat, hoc deniq; uere splendidum ac regium esse docens, de genere humano quā optime mereri. Vocat huc clarissimus princeps CAROLVS incorruptæ indolis adolescens. Nec abhorret Cæsar MAXIMILIANVS, Nec detractat inclytus Angliæ Rex Henricus. Tantorum principum exemplum cæteros libēter imitari par est, Maxima plebis pars bellum detestat, pacem orat, pauculi quidem modo quorum impia felicità a publica pendet infelicitate, bellum optant. Quorum improbitas ut plus ualeat, quā bonorum omnium uoluntas, æquum sit, nec ne, uos ipsi expendite. Videtis hæcenus nihil actum fœderibus, nihil promotum affinitatibus, nihil ui, nihil ulciscendo, Nunc contra periculum facite, quid possit placabilitas quid beneficentia? Bellum e bello feritur, ultio trahit ultionem. Nunc gratia gratiam pariat, & beneficium beneficio innitetur, isque regaliior uideatur, qui plus de suo iure concesserit, Non successit quod humanis studi


PACIS QVERIMONIA

is gestum est, at fortunabit ipse Christus pia concilia,
quæ se autore & auspice uiderit suscipi. Aderit dexter,
aspirabit, fauebitque fauētibus ei rei, cui fauit ipse pluri
mum, priuatos affectus publica uincat utilitas. Quam
quam dum huic consulitur, & sua cuique fortuna meli
or reddetur, principibus regnum erit augustius, si pijs
ac foelicibus imperent, ut legibus regnent magis quam
armis. proceribus maior ueriorque dignitas, sacerdoti
bus otium tranquillius, populo quies uberior,
& ubertas quietior, Nomen christianū for
midabilius crucis hostibus. Denique
singuli singulis, & omnes omnibus
chari simul & iucūdi eritis, super
omnia christo grati, cui pla
cuisse summa foelicitas
tas est.
DIXI











WYSTAWA OPRAWY
KSIĄŻKI - KRAKÓW
CZERWIEC/ LIPIEC 1925

WŁAŚCICIEL *Bołypotcha Jagiellońska*
NR. KATALOGU WYSTAWY 57.

